


Schiibe-Golf



E schpilerin bim ipute.

Sind Ine uf em Bonschtëtter schpil- und begänigsplatz bi de schuelhüuser äü scho die isige mètall-chörb mit de chëttene ufgfalle und händ Si sich äü scho gfroget, für was die ächt sind? Öpe gschtëll für die nasse turnschue, mässpükt fürd geomeeter oder gar e bröötlichtëll? De Kobo isch uszoge um die Sach z kläre.

Es sind frisbee-fänger-chörb, wo mer zum **disc golf** (schiibe-golf) schpile brucht. S ziil isch en frisbee (flugschiibe) i die chörb z schpile. Wä mer de frisbee druuf rüert, fünd d metall chëttene en uuf und läitene in fänger chorb. Wo d gmäind im jaar 2002 de nöi schpil- und begänigsplatz für 700'000 franken bout hët, hät sech de

oberschtufeleerer Ruedi Graf zäme mit em Urs Hanke vo Winterthur defür igetzt, sone disc-golf-aalag is gländ z integriere. D mee-chöschte für die 7 chörb händ nume 6000 franken beträit. 1 chorb schtaat zum trèniere a de Schuelrain-schtraas. Die andere 6 chörb bilde uf em schpilplatzgländ en parcour. Wä mer jède chorb drüü möl us drüü verschidene richtige aschpilt, ergit sich grad en 18er-parcour wie im golf. Läider isch im momant ein chorb aber inerhalb vo de abschpeerig vo de primarschuelhuus bäuschtël.

Disc golf isch e kombination zwüsche golf und frisbee schpile. Me schwätzt wie bim golf und rüert wie bim frisbee. Wänns mar-

kierti abwurfzoone hët, fòöt me deet a, suscht suecht me sich sälber äini (safari modus). Vo deet us rüert me d schiibe richtig chorb. Nohhär wartet me, bis die andere èbefalls grüert händ. Dää, wo am witische vom chorb ewäg isch, zerscht, list me sini schiibe uf und versuecht ernöit, se in chorb zrüere. Das widerholt me, bis es äim glingt, d schiibe in chorb «izpute». Dänn ziet me witer zum nächschte chorb. Jède zëllt, wie oft, as er grüert hët, und dä mit de wënigschte versüech gönnt.

Es git äü veräine, wo me **disc golf** intensiiver und professionëller schpile cha. De nögschti isch in Adliswil. Die verwändet näbe de normale frisbee schiibe äü chlineri und schwärereri, wo mer no witer chan rüere und besser träffe. Es git mäischterschafte und wär interessiert isch, mol de pröfis gö zuezluege, chan das bischpilswiis am 8. und 9. Äuguscht 2015 uf de Felsenegg bim Eagle Open Turnier.

Patrick Hippenmeyer

Quelle

- Heidi Mathys, ehem. hochbauamt Bonschtète
- Ruedi Graf, öberschtufeleerer, Bonschtète
- Rafael Heuri, präsident Big Birdies, Adliswil
- www.discgolf.ch

Dä artikel richtet sich nach de zürütütsche rächt-schriibig nach Schobinger, www.zuerituetsch.ch/schreiben.html



E gwönleche und e disc golf frisbee.



En volle fängerchorb.